

## Die bstellte Unnerbetter

Es dauert nimi lang, bis die Bäsl Anna un de Vetter Joschka ihre goldeni Hochzeit feire were. Villes im Haushalt is mit de Johre erneiert gin. Un jetz is die Red druf kumm: mir misste uns neiji Unnerbetter im Schlofzimmer anschaffe. Sie ware an ihre Better gewehnt, doch die ware so niedrich, dass die Bäsl Anna sich beim Ufstehn gut steiwe han misse, dass se hochkummt. Also han se sich entschloss, uf die alde Unnerbetter neiji drufzu leeje, dass es ne kummoder is sowohl beim Schlofe als ach Ufkrawwle.

Die zwaa sin in meh Gschäfetrumgstulpert, han sich villi Unnerbetter anschaut. Die Wahl is ne zur Qual gin. Endlich han se zugschlaa un kaaft, e guds Schippl Geld hingebblättert. Weil se natierlich druf geacht han, dass de Kaaf vun guter Qualität sin soll. Die Unnerbetter han zwaa Täch druf geliwwert, also gebrung gin selle. Zwischer nein un drei Uhr. Also hat die Bäsl Anna die Better morjets abgeraamt un die zwaa han gewart. Un gewart. Wie drei Uhr war un sich nix gerieht ghat hat, han se sich entschloss, dorte im Gschäft anzurufe. Freindlich han se Auskunft kriet, sie selle nor scheen weiter warte, de Transport werd sicher bis um sechs Uhr kumme.

Die Warterei is ne schun uf die Nerve gang. Um sechs Uhr han se nochmol angeruft un mer hat ne gsaat, die Unnerbetter sin schun ufm Wech. Wies schun geger nein Uhr owets gang is, hat die Bäsl Anna anfang, die Better wieder zu richte, weil es „Nani“ war jo nimi weit. Wie se frische Leintiecher, Matratze un Kisse uf de Better ghat hat, hats an der Tier geklingelt. Die Unnerbetter ware ankumm. Nix wie wieder alles abraame, die neije Unnerbetter auspacke un uf die Better tun, es Bettzeich wieder druf un em Schlofgehn hat nix me im Wech gstann!

Rheuma oder Ischias?

Die Bäsl Nani hats arich stark in de Glieder ghat. Nachts hat se nit schlofe kenne un sich vor lauter Weh im Bett hin un her gewänzelt. Am Tach, iwerhaupscht wanns Wetter umschlaa hat, hat se weder stehn noch gehn kenne. Eeni Flasch Franzbranntwein noh der anri hat se verschmiert un dermit ingerieb, es is un is nit besser gin. Do hat se des efre mit ihrer Nochberin, der Bäsl Bawi, derdriwert dischkuriert, was eigentlich e greeseri Pein is: Rheuma oder Ischias. Un die Bäsl Nani hat behaupt, sie hätt Rheuma un saat: „Weescht Bawi, wann mer eem sei Knie in e Schraubstock inspannt un dran dreht un dreht, dass mer alli Sterne gsieht un johlt wie e Hund. Un noh noch eemol schraubt, dass mer die Engle im Himmel singe heert – des is Rheuma“!

Do ment die Bäsl Bawi: „Un wann mer noch eemol am Schraubstock dreht, is es dann Ischias“?